

GARIS PANDUAN PERMOHONAN POTONGAN CUKAI DI BAWAH SUBSEKSYEN 34(6)(h) AKTA CUKAI PENDAPATAN 1967

1. Tujuan

Garis panduan ini bertujuan untuk memberi penjelasan mengenai kriteria dan prosedur am bagi permohonan potongan cukai di bawah subseksyen 34(6)(h) Akta Cukai Pendapatan (ACP) 1967 ke atas sumbangan yang dibuat bagi projek komuniti / amal yang diluluskan oleh Kementerian Kewangan (MOF) atau Pihak Berkuasa Kerajaan yang berkaitan (*Relevant Government Authority - RGA*).

RGA adalah Kerajaan, Kerajaan Negeri serta Pihak Berkuasa Tempatan yang dipertanggungjawab untuk menentusahkan nilai sumbangan dan meluluskan projek komuniti / amal berdasarkan kluster projek seperti yang disenaraikan di **Lampiran A1 dan Lampiran A2** dalam Garis Panduan ini.

2. Latar Belakang

2.1 Bagi menggalakkan penglibatan sektor swasta secara lebih aktif dalam memberi sumbangan kepada projek kebajikan dan kemasyarakatan, Kerajaan telah membenarkan potongan cukai daripada pendapatan kasar perniagaan suatu amaun bersamaan dengan sumbangan yang dilakukan bagi projek komuniti / amal yang layak.

2.2 Projek komuniti / amal dan nilai sumbangan hendaklah disahkan dan diluluskan oleh pihak-pihak berikut:

Nilai sumbangan	Pihak yang meluluskan projek komuniti / amal	Pihak yang mengesahkan nilai sumbangan
RM300,000 dan ke bawah	RGA	RGA
Melebihi RM300,000	MOF	RGA

3. Kriteria Projek Komuniti / Amal Yang Layak

3.1 Bagi tujuan potongan cukai di bawah subseksyen 34(6)(h) ACP 1967, projek komuniti / amal yang layak adalah projek yang berkait dengan:

- (i) Pendidikan;
- (ii) Kesihatan;
- (iii) Perumahan;
- (iv) Peningkatan pendapatan golongan miskin;
- (v) Infrastruktur;
- (vi) Teknologi maklumat dan komunikasi;
- (vii) Pemeliharaan dan pemuliharaan alam sekitar; dan

- (viii) Penyenggaraan dan pemuliharaan bangunan warisan yang telah ditetapkan / diisytiharkan sebagai tapak warisan dan tapak warisan kebangsaan sepertimana yang diperuntukkan di bawah Akta Warisan Kebangsaan 2005 [Akta 645].
- 3.2 Projek komuniti / amal hendaklah memberi manfaat semata-mata kepada orang awam di Malaysia tanpa mempunyai kepentingan langsung kepada penyumbang dan tidak bermotifkan keuntungan.
- 3.3 Projek komuniti / amal hendaklah disumbangkan secara percuma dan tiada sebarang balasan kepada penyumbang.
- 3.4 Projek komuniti / amal dibuat secara sukarela dan tidak disyaratkan oleh mana-mana pihak termasuk pihak berkuasa di bawah sesuatu peraturan / perjanjian.

Contoh 1:

Pemaju perumahan membuat sumbangan projek komuniti dalam bentuk pembinaan kemudahan awam berupa taman permainan kanak-kanak di taman perumahan. Projek komuniti tersebut adalah disumbangkan secara sukarela oleh pemaju dan bukan disyaratkan pembinaannya oleh pihak berkuasa.

4. Bentuk Sumbangan Yang Layak Mendapat Potongan Cukai Di Bawah Subseksyen 34(6)(h) ACP 1967 Dan Kaedah Penentuan Nilai Sumbangan

4.1 Bentuk sumbangan yang layak adalah seperti berikut:

- (i) Wang tunai;
- (ii) Peralatan baharu, contohnya komputer, mesin hemodialisis dan peralatan pandang dengar;
- (iii) Perkhidmatan, contohnya pemeriksaan kesihatan percuma kepada komuniti, tuisyen percuma kepada pelajar dan penyelenggaraan dewan orang ramai. Kos perkhidmatan termasuk bahan guna habis yang digunakan dalam perkhidmatan seperti ubat-ubatan kepada pesakit dan alat tulis atau buku yang diberikan kepada pelajar;
- (iv) Sumbangan dalam bentuk stok perdagangan (*stock in trade*) dan perkhidmatan yang sama dengan perniagaan yang dijalankan oleh penyumbang;

Contoh 2:

- (a) Syarikat Komputer Pintar Sdn. Bhd. memberi sumbangan 20 unit komputer baharu kepada Sekolah Menengah Tanjung Dawai menggunakan stok perniagaannya.

- (b) Klinik Pergigian Aminah memberi perkhidmatan rawatan pergigian secara percuma kepada penduduk kampung orang asli.
- (v) Projek infrastruktur yang siap sepenuhnya, contohnya pembinaan kemudahan awam seperti jalan raya, jambatan dan dewan orang ramai di mana orang awam tidak dikenakan sebarang bayaran atas penggunaan infrastruktur tersebut.

4.2 Kaedah penentuan nilai sumbangan:

- (i) Nilai sumbangan peralatan, perkhidmatan dan projek infrastruktur perlu ditentukan oleh RGA dan dibuktikan dengan invois pembelian peralatan, invois caj perkhidmatan serta pembuktian mengenai kos keseluruhan projek.
- (ii) Bagi maksud potongan cukai dalam mengira pendapatan larasan, kaedah penentuan nilai sumbangan adalah seperti berikut:
 - (a) Sumbangan yang dibuat dalam bentuk *stock in trade* adalah berdasarkan nilai kos stok perdagangan tersebut; atau
 - (b) Sumbangan yang dibuat dalam bentuk perkhidmatan yang sama dengan perniagaannya adalah berdasarkan nilai kos yang berkaitan pemberian perkhidmatan tersebut.

5. Pihak Yang Layak Memohon Potongan Cukai Di Bawah Subseksyen 34(6)(h) ACP 1967

- 5.1 Syarikat dan selain syarikat seperti individu, perkongsian, badan amanah dan koperasi yang mempunyai pendapatan perniagaan dan tertakluk di bawah ACP 1967.
- 5.2 Syarikat dan selain syarikat hendaklah menyalurkan sumbangan projek komuniti / amal:
 - (i) Secara terus kepada penerima projek; atau
 - (ii) Melalui mana-mana Kementerian / Jabatan / Agensi Kerajaan / Pihak Berkuasa Tempatan yang terlibat.
- 5.3 Institusi / Organisasi / Tabung yang diluluskan di bawah subseksyen 44(6) ACP 1967 tidak dibenarkan memohon potongan cukai di bawah subseksyen 34(6)(h) ACP 1967. Pihak Institusi / Organisasi / Tabung hendaklah menggunakan kemudahan layanan cukai di bawah subseksyen 44(6) ACP 1967 bagi menjalankan sebarang projek amal.

6. Prosedur Permohonan Kelulusan Projek dan Pengesahan Nilai Sumbangan Bagi Tujuan Potongan Cukai Di Bawah Subseksyen 34(6)(h) ACP 1967

6.1 Sumbangan yang bernilai RM300,000 dan ke bawah:

- (i) Kelulusan Projek oleh RGA
 - (a) Penyumbang hendaklah membuat permohonan melalui surat rasmi kepada RGA untuk mendapatkan kelulusan projek komuniti / amal terlebih dahulu dengan menyertakan bersama borang seperti di **Lampiran I**.
 - (b) RGA akan membuat penilaian sama ada projek yang dipohon memenuhi kriteria projek komuniti / amal yang layak dan memberi manfaat kepada orang awam. Contoh surat kelulusan projek yang dikeluarkan oleh RGA adalah seperti di **Lampiran II**.
- (ii) Surat Akuan Terima Penerima Projek
 - (a) Penyumbang hendaklah mendapatkan surat akuan terima daripada penerima projek seperti borang di **Lampiran III**.

Penerima Projek	Prosedur
Secara Terus	Penyumbang hendaklah mendapatkan surat akuan terima daripada penerima projek berserta dengan cop rasmi bagi menentusahkan nilai wang tunai / peralatan / perkhidmatan / projek infrastruktur yang diterima.
Melalui Agensi Kerajaan	

- (iii) Pengesahan Sumbangan oleh RGA
 - (a) Penyumbang hendaklah mendapatkan surat pengesahan bagi menentusahkan nilai sumbangan daripada RGA yang ditandatangani oleh Ketua Jabatan berserta dengan cop rasmi jabatan berdasarkan format seperti di **Lampiran IV**; dan
 - (b) Bagi tujuan pengesahan nilai sumbangan, penyumbang hendaklah menyediakan Laporan Projek Komuniti / Amal yang mengandungi dokumen seperti berikut:
 - (i) Surat kelulusan projek daripada RGA (**Lampiran II**);
 - (ii) Latar belakang projek;
 - (iii) Perincian projek;
 - (iv) Perincian kos projek;
 - (v) Penglibatan komuniti;
 - (vi) Surat akuan terima;
 - (vii) Gambar-gambar projek semasa projek berlangsung / projek siap dibina; dan

- (viii) Sijil perakuan siap dan pematuhan (*Certificate of Completion and Compliance - CCC*) atau Bukti Perisytiharan Projek / Kerja Pembinaan melalui *Centralized Information Management System* (CIMS) bagi projek infrastruktur. Sekiranya tiada keperluan CCC dikeluarkan, dokumen pengesahan projek siap sepenuhnya perlu dikemukakan.
- (c) Surat pengesahan seperti di **Lampiran IV** hendaklah disimpan oleh penyumbang untuk tujuan tuntutan potongan cukai di bawah subseksyen 34(6)(h) ACP 1967.

6.2 Sumbangan yang bernilai melebihi RM300,000:

- (i) Kelulusan Projek oleh MOF
 - (a) Penyumbang hendaklah membuat permohonan melalui surat rasmi kepada MOF untuk mendapatkan kelulusan projek terlebih dahulu dengan menyertakan bersama borang seperti di **Lampiran I**.
 - (b) MOF akan membuat penilaian sama ada projek yang dipohon memenuhi kriteria projek komuniti / amal yang layak dan memberi manfaat kepada orang awam. Contoh surat kelulusan projek yang dikeluarkan oleh MOF adalah seperti di **Lampiran II**.
 - (c) Permohonan berserta dokumen yang lengkap hendaklah dikemukakan kepada:

**Setiausaha Bahagian Cukai
Kementerian Kewangan Malaysia
Tingkat 6, Blok Tengah
Kompleks Kementerian Kewangan
Presint 2, Pusat Pentadbiran Kerajaan Persekutuan
62592 PUTRAJAYA**

- (ii) Surat Akuan Terima Penerima Projek
 - (a) Penyumbang hendaklah mendapatkan surat akuan terima daripada penerima projek seperti borang di **Lampiran III**.

Penerima Projek	Prosedur
Secara Terus	Penyumbang hendaklah mendapatkan surat akuan terima daripada penerima projek berserta dengan cop rasmi bagi menentusahkan nilai wang tunai / peralatan / perkhidmatan / projek infrastruktur yang diterima.
Melalui Agensi Kerajaan	

(iii) Pengesahan Sumbangan oleh RGA

- (a) Penyumbang hendaklah mendapatkan surat pengesahan bagi menentusahkan nilai sumbangan daripada RGA yang ditandatangani oleh Ketua Jabatan berserta dengan cop rasmi jabatan berdasarkan format seperti di **Lampiran IV**.
- (b) Bagi tujuan pengesahan sumbangan, penyumbang hendaklah menyediakan Laporan Projek Komuniti / Amal yang mengandungi dokumen seperti berikut:
 - (i) Surat kelulusan projek oleh MOF (**Lampiran II**);
 - (ii) Latar belakang projek;
 - (iii) Perincian projek;
 - (iv) Perincian kos projek;
 - (v) Penglibatan komuniti;
 - (vi) Surat akuan terima penerima projek;
 - (vii) Gambar-gambar projek semasa projek berlangsung / projek siap dibina; dan
 - (viii) CCC atau Bukti Perisytiharan Projek / Kerja Pembinaan melalui CIMS bagi projek infrastruktur. Sekiranya tiada keperluan CCC dikeluarkan, dokumen pengesahan projek siap sepenuhnya perlu dikemukakan.
- (c) Surat pengesahan seperti di **Lampiran IV** hendaklah disimpan oleh penyumbang untuk tujuan tuntutan potongan cukai di bawah subseksyen 34(6)(h) ACP 1967.

7. Prosedur Tuntutan Potongan Cukai Di bawah Subseksyen 34(6)(h) ACP 1967

- 7.1 Tuntutan potongan cukai ke atas sumbangan bagi projek komuniti / amal yang telah diluluskan oleh MOF atau RGA hendaklah dibuat melalui Borang Nyata Cukai Pendapatan (BNCP) bagi tahun taksiran di mana sumbangan telah dilakukan, tertakluk kepada perkara berikut:
- (i) Jumlah yang dibenarkan potongan adalah bersamaan dengan amaun sumbangan yang dilakukan;
 - (ii) Nilai sumbangan bagi projek komuniti / amal yang dituntut potongan cukai hendaklah sepertimana amaun yang ditentusahkan oleh RGA. RGA hendaklah menentusahkan nilai sumbangan berdasarkan perbelanjaan sebenar yang layak bagi projek komuniti / amal;
 - (iii) Tuntutan potongan cukai ke atas sumbangan wang tunai / peralatan / perkhidmatan yang layak adalah berdasarkan tarikh penerimaan sumbangan wang tunai / peralatan / perkhidmatan oleh penerima projek; dan

- (iv) Tuntutan potongan cukai ke atas sumbangan projek infrastruktur yang layak adalah berdasarkan tarikh CCC atau Bukti Perisytiharan Projek / Kerja Pembinaan melalui CIMS bagi projek infrastruktur. Sekiranya tiada keperluan CCC dikeluarkan, tuntutan potongan cukai adalah berdasarkan tarikh dokumen pengesahan projek siap sepenuhnya oleh mana-mana agensi yang berkaitan.

7.2 Penyumbang hendaklah menyimpan dokumen berikut bagi tujuan pengauditan oleh LHDNM:

- (i) Surat kelulusan projek komuniti / amal yang dikeluarkan oleh MOF atau RGA (**Lampiran II**);
- (ii) Surat akuan terima sumbangan daripada penerima projek (**Lampiran III**); dan
- (iii) Surat pengesahan nilai sumbangan bagi projek komuniti / amal yang dikeluarkan oleh RGA (**Lampiran IV**).

7.3 Prosedur tuntutan sekiranya sumbangan dibuat secara berperingkat:

- (i) Jika sumbangan dibuat secara berperingkat bagi suatu projek komuniti / amal berjangka panjang yang melibatkan tempoh melebihi setahun untuk disiapkan, penyumbang boleh mendapatkan surat pengesahan nilai sumbangan daripada RGA bagi setiap tahun taksiran di mana sumbangan telah dilakukan.

Contoh 3:

Syarikat Dinamik Sdn. Bhd. membina 10 buah perhentian bas di daerah Rembau. Projek pembinaan bermula pada bulan Mei 2025 dan dijangka siap pada bulan Ogos 2026. Jumlah keseluruhan projek ini melibatkan kos sebanyak RM100,000. Bagi tujuan potongan cukai, projek pembinaan perhentian bas ini hendaklah diluluskan oleh RGA. Butiran pembinaan perhentian bas seperti berikut:

Tempoh Projek	Bilangan Perhentian Bas	Nilai Sumbangan	Tahun Taksiran (TT) Tuntutan Cukai
Mei - Julai 2025	3	RM30,000	TT 2025
Ogos - Oktober 2025	3	RM30,000	
Januari - Mac 2026	2	RM20,000	TT 2026
Jun - Ogos 2026	2	RM20,000	

Nota: Syarikat Dinamik Sdn. Bhd. menutup akaun pada 31 Disember setiap tahun.

Berdasarkan contoh di atas, penyumbang hendaklah mendapatkan surat pengesahan nilai sumbangan daripada RGA untuk tujuan potongan cukai bagi kedua-dua TT 2025 dan TT 2026.

- (ii) Jika sumbangan dibuat secara berperingkat bagi suatu projek komuniti / amal yang sama di mana jumlah kumulatif sumbangan bagi projek yang dijalankan adalah melebihi RM300,000, maka penyumbang hendaklah mendapatkan kelulusan projek daripada MOF berserta penjelasan mengenai perincian sumbangan.

Contoh 4:

Syarikat Medihealth Sdn. Bhd. menyumbang 30 mesin ECG di 30 buah klinik kesihatan Kerajaan yang bernilai RM450,000. Sumbangan mesin ECG ini akan dibuat secara berperingkat dalam tahun 2025 dan 2026.

Tempoh Sumbangan	Bilangan Mesin ECG	Nilai Sumbangan	Tahun Taksiran (TT) Tuntutan Cukai
Mei - Julai 2025	10	RM150,000	TT 2025
Ogos - Oktober 2025	5	RM75,000	
Januari - Mac 2026	5	RM75,000	TT 2026
Jun - Ogos 2026	10	RM150,000	

Nota: Syarikat Medihealth Sdn. Bhd. menutup akaun pada 31 Disember setiap tahun.

Dalam senario ini, Syarikat Medihealth Sdn. Bhd. hendaklah mendapatkan kelulusan projek daripada MOF terlebih dahulu kerana nilai sumbangan adalah melebihi RM300,000. Bagi tujuan pengesahan nilai sumbangan untuk tujuan potongan cukai, penyumbang hendaklah mendapatkan surat pengesahan nilai sumbangan daripada RGA bagi TT 2025 dan TT 2026 mengikut tahun taksiran sumbangan dilakukan.

- (iii) Jika projek komuniti / amal telah diluluskan oleh MOF atau RGA dalam tempoh projek yang ditetapkan, kemudian dalam tahun yang sama penyumbang ingin membuat sumbangan tambahan bagi projek yang sama, penyumbang hendaklah mendapatkan kelulusan projek yang baharu dari MOF atau RGA berdasarkan nilai sumbangan tambahan tersebut, berserta penjelasan mengenai perincian sumbangan.

Contoh 5:

Syarikat AMZ Sdn. Bhd. menyumbang wang tunai sebanyak RM200,000 kepada Universiti Malaya (UM) bagi membina makmal sains pada bulan April 2025. Projek tersebut telah diluluskan oleh RGA. Kemudian, pada bulan Oktober 2025, Syarikat AMZ Sdn. Bhd. membuat sumbangan tambahan sebanyak RM150,000 kepada UM bagi projek yang sama.

Berdasarkan contoh ini, penyumbang hendaklah mengemukakan permohonan baharu kepada RGA bagi sumbangan yang dilakukan sebanyak RM150,000 kepada UM.

8. Kesalahan Mengemukakan Tuntutan Potongan Cukai Palsu

MOF atau RGA boleh menarik balik atau membatalkan kelulusan projek bagi tujuan potongan cukai di bawah subseksyen 34(6)(h) ACP 1967 pada bila-bila masa sekiranya didapati penyumbang mengemukakan maklumat atau dokumen tuntutan potongan cukai yang mempunyai butiran palsu atau tidak mematuhi apa-apa syarat yang ditetapkan.

9. Ketidakpakaian

Potongan cukai di bawah subseksyen 34(6)(h) ACP 1967 tidak terpakai bagi sumbangan seperti berikut:

- (i) Sumbangan tunai bagi projek komuniti / amal yang dibuat kepada Institusi / Organisasi / Tabung yang diluluskan di bawah subseksyen 44(6) ACP 1967; atau
- (ii) Sumbangan bagi projek infrastruktur yang tidak dapat diserahkan kepada penerima projek.

Contoh 6:

RGA meluluskan projek pembinaan 3 blok asrama anak yatim tetapi hanya 2 blok yang disiapkan dan diserahkan kepada penerima projek. Potongan cukai yang layak dituntut oleh penyumbang hanyalah ke atas sumbangan bagi pembinaan 2 blok asrama yang telah siap dan diserahkan kepada penerima projek tersebut.

10. Carta Alir Permohonan

Carta alir proses permohonan potongan cukai di bawah subseksyen 34(6)(h) ACP 1967 boleh dirujuk di **Lampiran V**.

11. Tarikh Kuatkuasa

Garis panduan permohonan potongan cukai di bawah subseksyen 34(6)(h) ACP 1967 ke atas sumbangan yang dibuat bagi projek komuniti / amal yang diluluskan oleh MOF atau RGA ini adalah berkuat kuasa mulai 15 September 2025.

**SENARAI *RELEVANT GOVERNMENT AUTHORITY* (RGA) BAGI PERMOHONAN
POTONGAN CUKAI DI BAWAH SUBSEKSYEN 34(6)(h) AKTA CUKAI
PENDAPATAN 1967**

Bil.	Kluster	Contoh Projek	Contoh RGA
1.	Pendidikan	(a) Sumbangan tunai / peralatan / perkhidmatan bagi tujuan pendidikan di sekolah rendah / menengah / agama (b) Sumbangan tunai / peralatan / perkhidmatan bagi tujuan pendidikan di Institut Pengajian Tinggi (IPT) (c) Program Integriti dan Antirasuah	(i) Kementerian Pendidikan Malaysia (ii) Kementerian Pendidikan Tinggi (iii) Jabatan Kemajuan Islam Malaysia (JAKIM) / Jabatan Agama Islam Negeri (iv) Suruhanjaya Pencegahan Rasuah Malaysia
2.	Kesihatan	(a) Sumbangan tunai / bantuan barangan / peralatan perubatan / perkhidmatan yang melibatkan perubatan di Hospital Awam / Agensi Kesihatan	(i) Kementerian Kesihatan
3.	Perumahan	(a) Projek Pembinaan Rumah Anak Yatim dan Warga Emas (b) Taman permainan, perhentian bas, dewan komuniti	(i) Kementerian Kerja Raya/JKR Negeri atau Daerah (ii) Kementerian Perumahan Kerajaan Tempatan (iii) Pejabat Setiausaha Kerajaan Negeri (iv) Pihak Berkuasa Tempatan

Bil.	Kluster	Contoh Projek	Contoh RGA
4.	Peningkatan pendapatan golongan miskin	(a) Sumbangan keperluan asas kepada gelandangan / anak yatim / golongan yang memerlukan	(i) Kementerian Pembangunan Wanita, Keluarga dan Masyarakat (ii) Bahagian Komuniti, Ibu Pejabat Jabatan Kebajikan Masyarakat (iii) Pejabat Setiausaha Kerajaan Negeri
5.	Infrastruktur	(a) Infrastruktur bangunan sekolah atau jalan raya sekolah (b) Membaik pulih sekolah (c) Pembinaan bangunan sekolah (d) Pembinaan masjid / rumah ibadat / dewan orang ramai	(i) Kementerian Kerja Raya (ii) Kementerian Pendidikan Tinggi (iii) Kementerian Pendidikan Malaysia (iv) Kementerian Perumahan dan Kerajaan Tempatan (v) Pejabat Setiausaha Kerajaan Negeri (vi) Pihak Berkuasa Tempatan
6.	Teknologi Maklumat & Komunikasi	(a) Program Rakan Digital	(i) Kementerian Digital (ii) Pejabat Setiausaha Kerajaan Negeri
7.	Projek penyenggaraan dan pemuliharaan bangunan warisan	(a) Sumbangan atau projek berkaitan bangunan warisan negara	(i) Jabatan Warisan Negara

Bil.	Kluster	Contoh Projek	Contoh RGA
8.	Projek pemeliharaan dan pemuliharaan alam sekitar	(a) Penajaan <i>Smart Artificial Intelligence (AI) – Driven Reverse Vending Machine (RVM)</i> (b) Kitar semula (c) Penanaman pokok dan program kesedaran (kempen, bengkel, seminar, persidangan)	(i) Kementerian Sumber Asli dan Kelestarian Alam (ii) Institut Penyelidikan Perhutanan Malaysia

**Senarai RGA yang disediakan adalah sebagai panduan umum sahaja. RGA juga boleh merujuk kepada Kerajaan Negeri dan Pihak Berkuasa Tempatan masing-masing mengikut jenis projek komuniti / amal / infrastruktur yang dibuat di setiap negeri.*

**PERMOHONAN UNTUK MENDAPAT KELULUSAN PROJEK KOMUNITI / AMAL
BAGI TUJUAN POTONGAN CUKAI KE ATAS SUMBANGAN DI BAWAH
SUBSEKSYEN 34(6)(h) AKTA CUKAI PENDAPATAN 1967**

Butir-butir Penyumbang:

- (i) Nama :
- (ii) Alamat :
.....
- (iii) No. Telefon :
- (iv) No. Faks :

Butir-butir Sumbangan:

- (i) Bentuk sumbangan : (Tandakan / di mana berkenaan)
- | | |
|----------------------|--------------------------|
| Wang Tunai | ☐ |
| Peralatan | ☐ |
| Perkhidmatan | ☐ |
| Projek Infrastruktur | ☐ |
- (ii) Nilai Sumbangan :
- (iii) Tarikh Sumbangan :
- (iv) Nama Agensi / Badan Penerima :
- (v) Alamat / No. Telefon / E-mel :

(vi) Bidang Projek / Program:

Pendidikan

☐

Kesihatan

☐

Perumahan

☐

Peningkatan pendapatan golongan miskin

☐

Infrastruktur

☐

Teknologi maklumat & komunikasi

☐

Projek pemeliharaan dan pemuliharaan alam sekitar

☐

Projek penyelenggaraan dan pemuliharaan bangunan warisan yang ditetapkan oleh JWN di bawah Akta Warisan Kebangsaan 2005

☐

(vii) Keterangan Projek / Aktiviti :

.....

.....

.....

(viii) Agensi Kerajaan Berkaitan :

Butiran Sekiranya Dalam Bentuk Peralatan

- (i) Nama barang : (misalnya komputer baharu).....
- (ii) Bilangan :
- (iii) Model dan buatan :
- (iv) Nilai Barang : RM.....

Butiran Sekiranya Dalam Bentuk Perkhidmatan

- (i) Jenis / nama perkhidmatan :
-
-
- (ii) Tempoh Penyediaan Perkhidmatan :
- (iii) Nilai Perkhidmatan : RM.....

Butiran Sumbangan Dalam Bentuk Projek Infrastruktur

(i) Alamat Projek:

.....

.....

.....

(ii) Pihak Berkuatkuasa Yang Meluluskan Projek : (contohnya Majlis Daerah)
(Sila sertakan surat kelulusan)

.....

(iii) Tarikh Siap Projek :

(iv) Tarikh Sijil Perakuan Siap dan Pematuhan (CCC) **:

(v) Nilai Sumbangan : RM.....

****Nota:** Bagi projek infrastruktur, sumbangan yang dibenarkan dituntut bagi maksud potongan cukai adalah bagi tahun taksiran di mana sumbangan telah dilakukan berdasarkan tarikh kelulusan CCC dan sekiranya tiada keperluan CCC dikeluarkan, ianya hendaklah berdasarkan tarikh dokumen pengesahan projek telah siap sepenuhnya.

Akuan Penyumbang

Saya mengaku segala maklumat atau dokumen yang diberi dalam borang adalah benar. Sekiranya didapati terdapat maklumat atau dokumen yang diberikan adalah palsu dan tidak memenuhi syarat yang ditetapkan, kelulusan yang diberi boleh ditarik balik atau dibatalkan.

Tandatangan Penyumbang :

No. Kad Pengenalan :

Jawatan (sekiranya berkenaan) :

Tarikh :

Cop Rasmi Syarikat / Perniagaan :

SURAT KELULUSAN PROJEK DARIPADA MOF / RGA

Ruj. Tuan :
Ruj. Kami :
Tarikh :

(Nama & Alamat Penyumbang)

.....
.....
.....

Tuan / Puan,

Permohonan Kelulusan Projek Komuniti / Amal Bagi Tujuan Potongan Cukai Di Bawah Subseksyen 34(6)(h) Akta Cukai Pendapatan 1967

Dengan hormatnya saya merujuk kepada surat permohonan tuan rujukan bertarikh mengenai perkara di atas.

2. Adalah dimaklumkan bahawa **MOF / RGA** bersetuju / tidak bersetuju projek(nama projek komuniti / amal)..... diluluskan sebagai projek komuniti / amal bagi tujuan potongan cukai di bawah subseksyen 34(6)(h) Akta Cukai Pendapatan 1967. Butiran projek komuniti / amal tersebut adalah seperti berikut:

- 2.1 Nilai sumbangan :
- 2.2 Tarikh sumbangan :
- 2.3 Penerima sumbangan :

3. Bagi tujuan menuntut potongan cukai ke atas sumbangan yang dibuat bagi projek komuniti / amal yang diluluskan di atas, penyumbang hendaklah menepati semua kriteria seperti mana yang ditetapkan dalam Garis Panduan Permohonan Potongan Cukai Di Bawah Subseksyen 34(6)(h) Akta Cukai Pendapatan 1967 dan syarat-syarat yang dinyatakan di dalam **Lampiran II(a)**.

Sekian, terima kasih.

"MALAYSIA MADANI"

"BERKHIDMAT UNTUK NEGARA"

Saya yang menjalankan amanah,

.....

Nama:
Jawatan:

s.k.: Bahagian Cukai, MOF
Jabatan Dasar Percukaian, LHDNM

Syarat-Syarat Kelulusan Permohonan Projek Komuniti / Amal Bagi Tujuan Potongan Cukai Di Bawah Subseksyen 34(6)(h) Akta Cukai Pendapatan 1967

1. Projek yang diluluskan kepada(nama penyumbang)..... adalah projek(nama projek)..... sebagai projek komuniti / amal yang diluluskan di bawah Subseksyen 34(6)(h) Akta Cukai Pendapatan 1967.
2. Jumlah sumbangan yang dibenarkan bagi tujuan potongan cukai ke atas perbelanjaan bagi projek(nama projek)..... di perenggan (1) di atas adalah tertakluk kepada had maksimum sebanyak RM sahaja.
3. Potongan cukai bersamaan dengan jumlah sumbangan hendaklah dituntut oleh penyumbang yang memberi sumbangan kepada projek komuniti / amal yang diluluskan seperti di perenggan (1) di atas.
4. Sumbangan wang tunai / peralatan / perkhidmatan yang dibenarkan dituntut bagi maksud potongan cukai adalah bagi tahun taksiran di mana sumbangan telah dilakukan.
5. Bagi projek infrastruktur, sumbangan kepada projek infrastruktur yang layak mendapat potongan cukai adalah berdasarkan tarikh sijil perakuan siap dan pematuhan atau dokumen pengesahan projek telah siap sepenuhnya.
6. Perbelanjaan projek komuniti / amal iaitu projek(nama projek)..... yang diluluskan hendaklah mendapat perakuan dan pengesahan daripada RGA yang terlibat.
7. Lain-lain syarat seperti yang ditetapkan melalui Garis Panduan Permohonan Potongan Cukai Di Bawah Subseksyen 34(6)(h) Akta Cukai Pendapatan 1967 seperti penyimpanan dokumen bagi tujuan pengauditan oleh pihak Lembaga Hasil Dalam Negeri Malaysia (LHDNM) adalah seperti berikut:
 - (i) Surat kelulusan projek daripada MOF atau RGA bergantung kepada nilai sumbangan;
 - (ii) Surat akuan terima sumbangan;
 - (iii) Surat pengesahan nilai sumbangan oleh agensi Kerajaan berkaitan; dan
 - (iv) Resit / invoice berkaitan dengan sumbangan.

SURAT AKUAN TERIMA SUMBANGAN DARIPADA PENERIMA PROJEK

No. Ruj.:

Tarikh :

Kepada :

(Nama & Alamat RGA)

**Surat Akuan Terima Sumbangan Wang Tunai / Peralatan / Perkhidmatan /
Pembinaan Projek Komuniti / Amal**

Dengan hormatnya saya merujuk kepada perkara di atas.

2. Saya No. Kad Pengenalan
berjawatan mengaku telah menerima sumbangan wang tunai /
peralatan baru / perkhidmatan / projek infrastruktur (potong yang tidak berkenaan)
daripada(nama penyumbang)..... pada
.....(tarikh)..... bernilai RM.....

3. Sumbangan ini adalah bagi projek(nama projek komuniti /
amal).....

4. Nama peralatan / perkhidmatan adalah seperti berikut:

(i)

(ii)

5. Saya mengesahkan bahawa projek (nama projek infrastruktur / perkhidmatan)
tersebut telah pun siap sepenuhnya (jika perkhidmatan / pembiayaan projek).

Sekian, terima kasih.

.....
(Tandatangan)

Nama :
Cop penerima projek :

SURAT PENGESAHAN NILAI SUMBANGAN DARIPADA RGA

No. Ruj :

Tarikh :

Kepada :

(Nama & Alamat Penyumbang)

Pengesahan Nilai Sumbangan Bagi Projek Komuniti / Amal Yang Diluluskan

Dengan hormatnya saya merujuk kepada perkara di atas.

2. Saya No. Kad Pengenalan berjawatan mengesahkan bahawa wang tunai / peralatan baru / perkhidmatan / pembinaan projek infrastruktur (potong yang tidak berkenaan) bernilai RM..... telah dibuat bagi projek yang diluluskan oleh Kementerian Kewangan / RGA melalui surat bil.:..... bertarikh

3. Saya juga mengesahkan(nama projek komuniti / amal)..... telah siap / diserahkan kepada (penerima projek)..... pada(tarikh).....

Sekian, terima kasih.

.....
(Tandatangan)

Nama :

Cop RGA :


Nota:

- i. Surat pengesahan ini hendaklah disimpan bagi tempoh 7 tahun untuk tujuan tuntutan cukai dalam tahun sumbangan dilakukan.
- ii. Invois pembelian barangan dan surat akuan terima hendaklah dikepikan bersama dokumen ini.

s.k.: Bahagian Cukai, MOF
Jabatan Dasar Percukaian, LHDNM

**CARTA ALIR PROSES PERMOHONAN POTONGAN CUKAI DI BAWAH
SUBSEKSYEN 34(6)(h) AKTA CUKAI PENDAPATAN 1967**

(Nilai Sumbangan RM300,000 dan ke bawah)



**CARTA ALIR PROSES PERMOHONAN POTONGAN CUKAI DI BAWAH
SUBSEKSYEN 34(6)(h) AKTA CUKAI PENDAPATAN 1967**

(Nilai Sumbangan Melebihi RM300,000)

